

ZAKON O IZMJENAMA I DOPUNAMA KRIVIČNOG ZAKONA BOSNE I HERCEGOVINE

Član 1.

U Krivičnom zakonu Bosne i Hercegovine ("Službeni glasnik BiH", broj 37/03) u članu 1. dodaje se novi stav (30) koji glasi: "(30) *Hemijsko oružje* je svaka hemikalija koja svojim djelovanjem na životne procese može prouzrokovati smrt, privremenu nesposobnost ili trajna oštećenja na ljudima, životinjama ili biljkama, nezavisno od njenog porijekla ili proizvodnje (otrovna hemikalija); svaki hemijski reagens koji učestvuje u bilo kojoj fazi proizvodnje neke hemikalije bilo kojim načinom (prekursor); municija i naprava namijenjena izazivanju smrti ili drugog zla ili štete te svaka oprema posebno načinjena za direktnu upotrebu u vezi s primjenom te municije ili naprave, ako takva hemikalija, reagens, municija, naprava ili oprema podliježu kontroli po međunarodnoj konvenciji koju je Bosna i Hercegovina ratificirala ili po propisima Bosne i Hercegovine".

Dosadašnji stavovi (30) i (31) postaju stavovi (31) i (32).

Član 2.

Iza člana 4. dodaje se novi član 4.a) koji glasi: "Suđenje ili kažnjavanje za krivična djela prema općim načelima međunarodnog prava. Članovi 3. i 4. ovog zakona ne sprečavaju suđenje ili kažnjavanje bilo kojeg lica za bilo koje činjenje ili nečinjenje koje je u vrijeme kada je počinjeno predstavljalo krivično djelo u skladu s općim načelima međunarodnog prava".

Član 3.

Član 186. mijenja se i glasi: "(1) Ko upotrebom sile ili prijetnjom upotrebe sile ili drugim oblicima prinude, otmicom, prevarom ili obmanom, zloupotrebom vlasti ili utjecaja ili položaja bespomoćnosti ili davanjem ili primanjem isplata ili drugih koristi kako bi se postigla privola lica koje ima kontrolu nad drugim licem, preveze, predaje, sakrije ili primi lice, u svrhu iskorištavanja prostitucije drugog lica ili drugih oblika seksualnog iskorištavanja, prisilnog rada ili usluga, ropstva ili njemu sličnog odnosa, služenja, odstranjivanja dijelova ljudskog tijela ili drugog izrabljivanja, kaznit će se kaznom zatvora od jedne do deset godina.

(2) Ko vrbuje, preveze, predaje, sakrije ili primi dijete ili maloljetnika, radi izrabljivanja iz stava (1) ovog člana, kaznit će se kaznom zatvora najmanje pet godina.

(3) Ko organizira ili bilo kako rukovodi grupom ljudi radi činjenja krivičnog djela iz stava (1) ili (2) ovog člana, kaznit će se kaznom zatvora najmanje deset godina ili kaznom dugotrajnog zatvora.

(4) Bez utjecaja je na postojanje krivičnog djela trgovine ljudima okolnost da li je lice pristalo na izrabljivanje iz stava (1) ovog člana".

Član 4.

U članu 188. iza riječi "Ko" dodaje se zarez i riječi: "s ciljem ograničavanja slobode kretanja ili ispoljavanja vlasti nad drugim licem", a riječi: "njegovu identifikacijska dokumenta ili pasoš" zamjenjuju se riječima: "njegovu ličnu ili putnu ispravu".

Član 5.

Član 189. mijenja se i glasi: "(1) Ko iz koristoljublja prevede preko državne granice jedno ili više lica koja ne ispunjavaju uslove za zakoniti ulazak preko državne granice ili ko omogući drugome nedozvoljeni prelazak granice, kaznit će se kaznom zatvora od šest mjeseci do pet godina.

(2) Ko iz koristoljublja omogući licu koje nije državljanin države primateljice niti u njoj ima stalni boravak da ostane na području te države bez ispunjavanja uslova za zakoniti boravak, kaznit će se novčanom kaznom ili kaznom zatvora do tri godine.

(3) Ako je pri počinjenju krivičnog djela iz stava (1) ovog člana doveden ili je mogao biti doveden u opasnost život ili sigurnost lica koja se prevode preko državne granice, ili je prema njima postupano u svrhu izrabljivanja ili na drugi nečovječan ili ponižavajući način, počinilac će se kazniti kaznom zatvora od jedne do osam godina.

(4) Ako je pri počinjenju krivičnog djela iz stava (2) ovog člana doveden ili je mogao biti doveden u opasnost život ili sigurnost lica kojima je omogućen nezakonit ostanak na području države primateljice, ili je prema njima postupano u svrhu izrabljivanja ili na drugi nečovječan ili ponižavajući način, počinilac će se kazniti kaznom zatvora od šest mjeseci do pet godina.

(5) Ko organizira grupu ljudi ili bilo kako rukovodi grupom ljudi, s ciljem počinjenja krivičnog djela iz stava (1) ili (2) ovog člana, kaznit će se kaznom zatvora najmanje deset godina ili kaznom dugotrajnog zatvora".

Član 6.

U članu 192. stav (1) riječi: "liši života" i zarez iza riječi: "Ko lice pod međunarodnom pravnom zaštitom" brišu se.

Član 7.

U naslovu člana 193. iza riječi: "vojnom opremom" dodaju se riječi: "te proizvodima dvojne upotrebe".

U članu 193. stav (1) iza riječi: "bez dozvole propisane zakonom Bosne i Hercegovine" dodaju se riječi: "ili u suprotnosti s međunarodnim pravom".

Iza stava (1) dodaje se novi stav (2) koji glasi: "(2) Ko počini krivično djelo iz stava (1) ovog člana u pogledu proizvoda, računarskih programa ili tehnologije koji se mogu upotrijebiti u vojne svrhe, kaznit će se kaznom zatvora od jedne do pet godina".

Dosadašnji stavovi (2) i (3) postaju stavovi (3) i (4). Iza dosadašnjeg stava (3), koji postaje stav (4), dodaje se novi stav (5) koji glasi: "(5) Ko počini krivično djelo iz stava (2) ovog člana iz nehata, kaznit će se novčanom kaznom ili kaznom zatvora do tri godine".

Član 8.

Iza člana 193. dodaje se novi član 193.a koji glasi: (1) Ko, protivno propisima Bosne i Hercegovine ili pravilima međunarodnog prava, izrađuje ili usavršava, proizvodi, nabavlja, gomila ili skladišti, nudi na prodaju ili kupuje, posreduje u kupovini ili prodaji ili na drugi način neposredno ili posredno prenosi drugome, posjeduje ili prevozi hemijsko ili biološko oružje ili kakvo drugo sredstvo borbe koje je zabranjeno pravilima međunarodnoga prava, kaznit će se kaznom zatvora od jedne do deset godina.

(2) Ko za vrijeme rata ili oružanog sukoba naredi da se upotrijebi hemijsko ili biološko oružje ili kakva borbena sredstva ili način borbe koji su zabranjeni pravilima međunarodnog prava, ili ih sam upotrijebi, kaznit će se kaznom zatvora najmanje tri godine.

(3) Ako je krivičnim djelom iz stava (1) i (2) ovog člana prouzrokovana smrt jednog ili više lica, ili su nastupile teške posljedice za zdravlje ljudi ili životinja ili teške posljedice po okoliš, počinitelj će se kazniti kaznom zatvora najmanje pet godina ili kaznom dugotrajnog zatvora.

(4) Ko vojno priprema upotrebu oružja, sredstva ili načina iz stava (2) ovog člana, kaznit će se kaznom zatvora do tri godine".

Član 9.

Član 237. mijenja se i glasi: "(1) Ko neovlašteno drugom otkrije ono što je saznao iz sudskog, prekršajnog, upravnog ili disciplinskog postupka pred institucijama Bosne i Hercegovine, a što se po zakonu ne smije objaviti ili je odlukom Suda Bosne i Hercegovine ili drugog nadležnog organa ili institucije Bosne i Hercegovine proglašeno tajnim, kaznit će se novčanom kaznom ili kaznom zatvora do jedne godine.

(2) Ko neovlašteno objavi, posreduje u objavljivanju, omogućiti objavljivanje ili učini dostupnim ono što je saznao iz sudskog, prekršajnog, upravnog ili disciplinskog postupka pred institucijama Bosne i Hercegovine, a što se po zakonu ne smije objaviti ili je odlukom Suda Bosne i Hercegovine ili drugog nadležnog organa ili institucije Bosne i Hercegovine proglašeno tajnim, kaznit će se novčanom kaznom ili kaznom zatvora do tri godine".

Član 10.

Naziv člana 240. mijenja se i glasi: "Otkrivanje identiteta zaštićenog svjedoka".

Član 240. mijenja se i glasi: "(1) Ko neovlašteno drugome saopći, preda ili preduzme drugu radnju s ciljem otkrivanja podataka o identitetu ili informacija koje mogu dovesti do otkrivanja identiteta lica koje je pružilo dokaz ili treba pružiti dokaz pred institucijama Bosne i Hercegovine, a koje se po zakonu ne smiju objaviti ili su odlukom Suda Bosne i Hercegovine ili drugog nadležnog organa ili institucije Bosne i Hercegovine proglašene tajnima, kaznit će se kaznom zatvora od tri mjeseca do tri godine.

(2) Sudija Suda Bosne i Hercegovine ili drugo službeno lice koje neovlaštenom licu učini dostupnim podatke ili informacije iz stava (1) ovog člana, kaznit će se kaznom zatvora od šest mjeseci do pet godina.

(3) Kaznom iz stava (2) ovog člana kaznit će se i ko neovlašteno objavi, posreduje u objavljivanju, omogućiti objavljivanje ili učini dostupnim podatke ili informacije iz stava (1) ovog člana.

(4) Ko slučajno došavši do otkrivenih, ali ne i objavljenih podataka ili informacija iz stava (1) ovog člana, te podatke ili informacije prenese ili učini dostupnima, znajući za njihovu prirodu, kaznit će se novčanom kaznom ili kaznom zatvora do jedne godine.

(5) Počinitelj krivičnog djela iz stava (1) i (3) ovog člana, koji na zahtjev nadležnog organa ne otkrije izvor i način saznanja podataka ili informacija iz stava (1) ovog člana, kaznit će se kaznom zatvora od jedne do osam godina.

(6) Počinitelj krivičnog djela iz stava (4) ovog člana, koji na zahtjev nadležnog organa ne otkrije izvor i način saznanja podataka ili informacija iz stava (1) ovog člana, kaznit će se novčanom kaznom ili kaznom zatvora do tri godine".

Član 11.

Ovaj zakon stupa na snagu osmog dana od dana objavljivanja u "Službenom glasniku BiH".